

Gingjveih Ronghmyanz

闪亮的警徽

□ Lingz Siuyangh/ 凌秀香



(ciep geiz gonq)

Gohcangj: “Dwg mwngz gag naeuz nw.”

Gohcangj hai bonjgeiqloeg daeuj raiz naeuz: Ngoenzneix Daegmuz hwnjban seizgan bae ngonz duzdaek gaeb non.

Daegmuz: “Gohcangj, mbouj yienghneix raiz ndaej ma? Neix dwg daih’ it bae, caiq-naeuz, da gou mbouj lizhai dounghung saek-yaep. Ciuq Fuzwjmozswah gij lijn buqanq de, duzdaekmax gaeb duzbib, roeglaej youq laeng.”

Gohcangj: “Gou raiz gij neix dwg mbouj dwg caen?”

Daegmuz: “Dwg.”

Hauhneix mwngz lij miz maz ndeigangj dem? Gohcangj geuhgen bae lo.

Ngoenz daihngieih banhaet, gohcangj daeuj dingj lingh bouchendou hwnjban. Banringz, Daegmuz daeuj ciepban, de youq bonjgeiqloeg raiz naeuz: Ngoenzneix gohcangj daeuj dingjban, mbouj ngonz duzdaek gaeb non.

Gohcangj hozndat lo: “Mwngz baenzneix raiz, boizhaemz gou?”

Daegmuz: “Mbouj gamj? Nanzdauh mwngz hix ngonz?”

Gohcangj: “Gou mbouj lumj mwngz guh gij saeh lwgnyez haenx.”

Daegmuz: “Neix couh baenz lo.”

Gohcangj: “Ndei! Daj ngoenzcog hwnj mwngz bae dieghong soujdou, gizde noix vunz, gizde duzdaek duznong cingq lai.”

Giz dieghong dwg dieghong guhranz, aenlaeuz cingq hwnj ndaej bet caengz. Aen diucehhung cingq baenqlulu guhhong. Gyoengq vunzhong bouch nengh gik, bouch laeb gik, bouch nengh sahoi, bouch gwed faex daengjdaengj, bouchbouch nyaengqfofo.

Douhung dwg aeu faexbenj daep baenz, aen congz ndeu, song aen daengq, cungj dwg faexbenj guhbaenz, coyod, saedyungh. Aen denfunghcen ndeu daengj gwnznamh, swenj huhu.

Daegmuz naengh gwnz daengq, ngiengx-gyaeuj yawj coh dingjlaeuz, sim ngeix: Cograwz ndaej youq laeuzsang, yawj doh daengxsingz. Cihbak loh miz sairiu.

Aen ciq ndeu hai haeuj, Daegmuz ndwn youq bakdou, fat mbaw gaj ndeu hawj de. Youh miz aen gajceh ndeu hai haeuj, Daegmuz fat mbaw gaj ndeu hawj de. Miz aen gajceh ndeu hai ok, Daegmuz sou mbawgaj dauq, bin hwnj

ci bae yawj, mbouj raen miz maz, cuengq bae lo.

Haetneix, miz 30 lai bouch minzgungh, miz bousai bouchmbwk, yaek roemx haeuj dieghong bae, ngaiz Daegmuz laengz dwk.

Daegmuz dawz gep baiz ndeu daeuj daengj: Dieghong haihong, vunzhoengq gaej haeuj!

Gyoengqvunz naeuz: Vunzhoengq? Dou mbouj dwg vunzhoengq. Dou daeuj aeu goengdauh. Gangj sat, couh yaek cung haeujbae. Daegmuz aj song cikgen lanz dwk.

Seizneix, miz bouch he daj gyang vunz lai byaij okdaeuj, yawj le yawj Daegmuz, naeuz: “Mwngz mbouj dwg youq giz roencibcih dang gyauhgengj ma, vihmaz daengz neix soujdou ne?”

Daegmuz: “Deng! Gunghcoz aeuyungh. Sou mbouj ndaej haeujbae, ndawde yungyiemj.”

Bouch haenx naeuz: “Vihliux aeu goengdauh, hwnj bomid roengz haijfeiz cungj mbouj lau, gyoengq beixnuengx cung ha! Vunz lai cai roemx baez moq.”

Daegmuz aenq saeh mbouj ndei, gaemdawz aen duigyanggih hemq: “Bangunghsiz, bangunghsiz, miz 30 lai vunz cung haeuj dounghung bae.”

Ndaw duigyanggih naeuz: “Lanz dwk! Mbouj cix haep dou.”

Roengzban lo, Daegmuz bae ciep mehyah, youh ciep daeglwg caemh maranz. Gwnzroen, samde lwnh gij saeh ngoenz neix. Daeglwg: “Ngoenzneix gou ndaej ciengj, boh, mwngz ciengj maz hawj gou?” Daegmuz: “Maz ciengj? Mbouj dwg danyienz gaujsi ba?” Daeglwg: “Boh, mwngz yawjsiuj gou lo, sengj cozwvwnz doxdax ngeih daengjciengj.” Daegmuz: “Daeglwg gou ak bw, wnggai ciengj, mwngz siengj aeu maz?”

Daegmuz gangjsat nyex yawj mehyah mbat ndeu, cij raen naj de nyaeuqnyat, lumj mbouj simhai nei.

Daegmuz: “Mehyah, mwngz simnyap maz ni?”

Mehyah: “Ngoenzneix gou sou ndaej mbaw ngaenzgyaj ndeu.”

Daegmuz: “Neix mbouj youqgaenj ndwi, baezlaeng siujsim di couh baenz lo.”

Mehyah: “Mbouj youqgaenj? Mwngz laihaeuz mwngz dwg bouchmiz ha? Mboujdan ngaiz ndaq, lij gau bae gij cienzciengj ndwen neix dem.”

Daeglwg: “Boh, mwngz ni, miz maz saehndei?”

Daegmuz: “Gou ya……”

“Gouq mingh ha……”

Cingq youq seizneix, ndaejnyi sing mehmbwk ndeu hemq gouqmingh. Riengz sing yawj bae, baihnaj giz mbouj gyae haenx, miz vunz dajgiep, song daegmbauq cingq dajgiep aen daeh dahsau ndeu. Dahsau buekmingh gammaenh aendaeh mbouj cuengq, gyoengqde

doxdog doxlaengq.

Daegmuz daengx ci. Meh yah got de ndaetndaet. Daeglwg dwglau dwk yawj gizhaenx.

Daegmuz gyod fwngz mehyah, mehyah got ndaej engq maenh: “Mwngz mbouj ndaej caiq cauxhux lo, raeuz boekfan mbouj hwnj……”

Daegmuz okrengz cengq mbat ndeu, mehyah dauqdaej guh mbouj gvaq de, Daegmuz vaiqvid cung baenaj.

Song daegmbauq raen miz vunz daeujdaengz, cix dawz mid okdaeuj, bi bae bi dauq, naeuz, “gaej guenj saeh neix, gvaqdaej couh aeu mingh mwngz.” Song fag mid lwenqmyigmyig.

Daegmuz daihsing hemq: “Dingzfwngz! Caeuq gou bae douzanq.”

Daegmbauq ndeu: “Hw hw! Dwgriu!”

Daegmuz cung gvaqbae, fwngz dub ga dik.

Mehyah gingmwnh yaep he cij siengj daengz bauqanq.

Daegmuz mbouj rox bae lawz aeundaiej baenz lai rengz, mbat gienz ndeu, mbat din ndeu couh dawz song daegmbauq dik laemxboek gwnznamh, youh riengjret dwk dik duet fagmid gyangfwngz bouch haenx, ciengj ndaej dauq aendaeh hawj dahsau. Dahsau dwglau dwk daengx ndang saenzdedded, suk baenz gaemz ndeu. Daegmuz fuz de hwnq, cingq youq seizneix, ndaejnyi daeglwg daihsing hemq: “Boh! Baihlaeng miz vunz……”

Hoeng, ceiz lo, baihlaeng Daegmuz ngaiz mid coeg deng.

Aen ci gingjaz swenj “vi u vi u” daengz lo. Song daegmbauq buetdeuz, hoeng, deuz mbouj gvaq gingjaz.

Cigouqmingh daeuj aeu Daegmuz bae yihyen.

Ndaw binghfuengz, mehyah souj youq, daeglwg hix youq, de mbouj dingz mbouj duenh heuh: “Boh boh……”

Lingjdaej hix daeuj lo, lingjdaej gaemfwngz Daegmuz heuh: “Daegmuz Daegmuz……”

Daegmuz mbouj oksing. Meh yah siemq goekrwz de naeuz: “Lingjdaej daeuj yawj mwngz lo.” Daegmuz menhmenh haida. Lingjdaej naeuz: “Daegmuz dungzci, gou daiyauj gizdangjcuuj naeuz gienh saeh ndeu, gizdangjcuuj yenzgiu gietdingh hawj mwngz geiq baez samdaengjgoeng ndeu, doengzseiz hawj mwngz cienjguh bouch gingjaz cingq sik ndeu.”

Raemxda Daegmuz lae okdaeuj, riengz gaeuda lae daengz goekrumz, lae daengz gwnz swiz, aenbak doenghyedyed, haemq nanz cij gangj ndaej ok vah: “Gou dauqdaej ndaej guh bouch gingjaz cingq sik ndeu lo!”

Mehyah gaengawq gij ronghda bouchgvan, aeu aenmauh daeuj hawj de.

Aen gingjveih ronghlwenq gwnz mauh, Daegmuz rubluh bae rubluh dauq……

(sat)